

Ama' yej kijekuiloj San Judas

Judas kijekuilowiliá yej kitokaj Jesús

¹ Neĵ niJudas, itekipanowani Jesucristo, neĵ iyikniñ Santiago, nimitzijekuilowiliáj inin ama' yej toTaj Dios mitzchokiliáj, mitznutzkej iwán mitztapejpenkej iwán yej Jesucristo mitzomemawíáj iga ansetitokej iwán. ² Dios poxsan mamitziknelikan iwán makichiwa iga xonokan tamelá iwán máj mamitzchokilikan Dios.

Yej takajkayáwajpa kuá' tamachtíáj

³ Nokniwan yej nimitzpoxchokiliáj, poxsan nimitzijekuilowilijnekiáj iga kén iga Dios tesalvarowa. E' inán nemi nimitzijekuilowiliáj iga manimitzijlikan iga amo ni alin xikajtewakan yej ankicredojkej, yej sesan vej toTeko tenextilij kén iga tesalvarowa tejemej yej tetapejpen. ⁴ Porque sekin tajtaga' yej takajkajajtinemij, yokaasij kan anmonechkowaj iwán mitznamolmachiáj iga Dios nochipa te-ikneliá iwán ijkón kijtowaj iga se welki' ay-ompa nemi iga kimatito' iga Dios yawi kiperdonaroti. Ayo' no kichiwaj ken tetekimaka toTeko Jesucristo, yéjsan yej kajasi iga matemandaro. Desde íyaya Dios kijtoj iga inomej yawij kicastigarotij.

⁵ Malej ankimatija, amo xikelkawakan yej kipasarojkej israelitajmej kuá' toTeko kikixtij inomej kan esclavojti-toyaj Egipto; yej ayá' kichijkej ken Dios kijtowa, kimi-jmiktij. ⁶ No xikejlamikikan angelejmej* yej akichijkej itekipanolmej yej Dios kimakakaj iwán kiyokakajtejkej

* 1:6 1:6 Xikita glosario "Ángel".

kan katka ichamej. Iwán Dios kipresojuw inomej angelejmej kan takomichkan iwán ompa ilpitoskej este kua' Dios yawi tajuzgaroti. ⁷ Ijkonsan no xikejlamikikan yej chantitoyaj ipan altepemej Sodoma iwán Gomorra iwán sekin altepe' yej najna'san onokej; yejemej kitekichijtoyaj yej ayekti iga motekayaj wan a'san nesi iwán kichiwayaj yej ayá' kajasi. Inón iga Dios kicastigaroj inomej iga ti'ti yej ayí' sewi, iga ipan yejemen nochi mamixkuitikan.

⁸ Malej ijkón kimatitokej in inimej yej takajkayajtine-mij, e' yejemej kijtowaj iga Dioski' kitemiktiáj iga wel kichiwayaj yej ayekti iga icuerpojmej. Iwán ayá' kichiwayaj ken kijtowa toTeko, iwán maltajtowaj iga angelejmej yej onokej ipan cielo. ⁹ Niga Miguel, yej el ángel yej máj mandarowa, kua' mokuejkuesojtoyaj iwán Tzitzimi' iga Tzitzimi' kikuisnekiá icuerpoj Moisés, Miguel ayá' mixewij iga kimalijlij Tzitzimi', sino que kijtoj: “NoTeko mamitzcastigaro.” ¹⁰ E' inomej tajtaga' maltajtowaj iga angelejmej yej ayá' kixmatij. Yejemej ken tikita animalmey yej awel tajlamikij iga kichiwayaj kensan kineki iyalmajmej, e' iga inón kichiwayaj yawij poliwitij.

¹¹ Yejemej yawij kisufrirotij iga kichiwayaj ken kichij Caín.† Iwán kichiwayaj yej ayekti iga kiplasnékijsan tomin kensan Balaam.‡ No mopoypoloskej kensan Coré§ iga akichiwaskenij ken toTeko tatekimaka.

¹² Kua' anmonechkowaj iga an-ilwichiwaj iga anke-klamikij toTeko Jesús,* inimej yej ayompa tamachtíaj no asij wan sentakuaj wan amejemen, e' akimajmawiliáj Dios. Yejemej ken tikita tejté yej takakalojto' ipan ye'tzótzol. Yejemej ken pastorme yej yejémensan mocuidarowaj.

† 1:11 1:11 Caín kimiktij iyiknijn. Gn 4:8 ‡ 1:11 1:11 Num 22:1-35 § 1:11 1:11 Coré katka rebelde icontraj Moisés. Num 16:1-35, 26:9,10 * 1:12 1:12 Xikita glosario “Santa Cena”.

Yejemej ken tikita mixti yej kiwiga ejeka', e' ni alín akimaga tiawa'. Iwán yejemej ken tikita kuawimej yej ayá' takij, mela'miktókeja iga kiwiwítákeja este inelwayo. ¹³Yejemej ken tikita inón maréjal yej poxsan mopapalaka-chowa, iwán yej kichijtokej, ken tikita iposonka maréjal. Iwán yejemej ken tikita sítalimej† yej ay'ya kimatij kan yawij iwán onókeja iga yawij kicastigarotij kan paréj takomichkan, kan nochipa onoskej.

¹⁴Enoc onoko kua' pánoja siete tetaj yej ipilówampa ipilowan Adán. Enoc ijkín kijtoj kensan Dios kitajtólma': "Nikita' toTeko wi' iwán poxsan komati iyangelejmej ¹⁵iga kijuzgaróki nochi, iwán iga kicastigaróki nochi yej ayá' ye'nemikej, iga kichijkej yej ayekti iwán iga inochi tajtolmej yej iga kimalijlijkej Dios." ¹⁶Yejemej poxsan tapopowaj, ayí' onoj tamelá, iwán yejemej kinekij makichiwakan yejsan kineki iyalmajmej. Poxsan moweyimatij. Iwán siga monenekij agaj ípan, kansan mamoye'chiwakan.

Judas tanonotza iga maye'nemikan

¹⁷E' amejemen, noknimej yej nimitzpoxchokiliáj, amo xikelkawakan iga apostolejmej‡ yej kititan Jesucristo ¹⁸mitzijlíjeja: "Kua' ay'ya wejka iga wi' sej toTeko, onoti sekin yej kajawilmatiskej yej kijtoj Dios iwán kichiwasjej yej ayekti san ken kineki iyalmajmej." ¹⁹Inómejwa' in yej kitemowaj iga amo xonokan sesan ípan iyojwi Dios. Yejemej kichiwaj ken yejemej kinekij iwán ayá' kipiáj iyEspíritoj Dios.

²⁰E' amejemen, nokniwan yej nimitzpoxchokiliáj, ximosepanmachtikan itájtól Dios yej anikredojkej. El Espíritu Santo mamitzpalewikan kua' antajtowaj wan Dios.

† 1:13 1:13 Anka xi'tzimej. ‡ 1:17 1:17 Xikita glosario "Apóstol".

²¹ Ayí' xikelkawakan iga Dios mitzchokiliáj, iwán xikchix-tokan inón día kua' toTeko Jesucristo yej te-ikneliá, kichiwas iga nochipa matonokan iwán yéj.

²² Xikpalewikan iwán xikyolyamanakan inomej yej ayá' kitawelcredowaj. ²³ Iwán sekin xikpowilikan itájtol Dios iga no mamosalvarokan iga amo matatakan pan tiwelon; iwán sekin xikiknelikan, e' ximocuidarokan de yejemej, iwán este itzotzolmej yej kakijtinemij iga kichiwas yej ayekti, xikijyilikan.

Mamoweyimati Dios

²⁴ Dios wel tepalewiá iga amo matikajtewakan iyojwi. Iwán wel tewiga iyixtaj este tipaktoskej, tonoskej ken tikita ayá' tikchijkej yej ayekti. ²⁵ Yéjsan iselti Dios, yéj yej wel tesalvarowa iga amo matecastigarokan iga tikchijkej yej ayekti. ToTeko Jesucristo makichiwa iga la gente makiweyimatiltikan Dios, yéjsan yej wel kichiwa nochi nokta, yéj ikyay onoya, inán ono' iwán nochipa onos. Ijkónyawa'.

Itájtōl toTēko ipan mela'tájtōl
Nahuatl, Isthmus-Mecayapan: Itájtōl toTēko ipan mela'tájtōl New
Testament

copyright © 2016 Wycliffe Bible Translators, Inc.

Language: Nahuatl, Isthmus-Mecayapan

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 14 Jun 2022 from source files dated 25 Mar
2022

8d5b6a33-8846-5c0f-ae8f-62c94f894f7b